

# MAKURU KI MU IHURIRO RY'IGIHUGU RY'IMITWE YA POLITIKI MU RWANDA



## IHURIRO RYAKIRIYE ABASHYITSI B'ABANYAMA- HANGA BANYURANYE BAGANI- RA KU BIKORWA BY'AMATORA YO MURI NYAKANGA 2024



Mu gihe cy'imyiteguro y'amatora ya Perezida wa Repubulika n'ay'Abadepite yo muri Nyakanga 2024, Ihuriro ry'Igihugu Nyunguranabitekerezo ry'Imitwe ya Politiki ryakiriye abashyitsi b'abanyamahanga banyuranye bari bakeneye kumenya imikorere y'Ihuriro n'uruhare rwaryo mu bikorwa by'ayo matora yategurwaga.



Tariki ya 27 Kamena 2024 n'iyaya 10 Nyakanga 2024, Itsinda ry'Impuguke n'Indorerezi zo mu Muryango w'Afurika w'Iburasirazuba (East African Community - EAC), bagiranye ibiganiro n'Ubuyobozi bw'Ihuriro ry'Igihugu Nyunguranabitekerezo ry'Imitwe ya Politiki. Ibiganiro byibanze ku mikorere y'Ihuriro n'uruhare rwaryo mu bikorwa by'amatora ya Perezida wa Repubulika n'ay'Abadepite yo muri Nyakanga 2024. Abashyitsi bashimye ko Ihuriro rigira uruhare mu kubaka ubushobozi bw'urubyiruko n'abagore bo mu Mitwe ya Politiki.

Ibiganiro byabereye muri Hotel Park inn, iri mu Kiyovu, mu Mujyi wa Kigali.

Tariki ya 02 na 12 Nyakanga

2024, Itsinda ry'indorerezi zo mu Muryango w'Ibihugu bivugaga Ururimi rw'Igifaransa (Organisation Internationale de la Francophonie/OIF), ryasuye Ihuriro ry'Igihugu Nyunguranabitekerezo ry'Imitwe ya Politiki. Aba bashyitsi bari bakeneye kumenya imikorere y'Ihuriro, uko riteza imbere demokarasi ishingiyeye ku bwumvikane, n'uburyo ryubaka ubushobozi bw'urubyiruko n'abagore bo mu Mitwe ya Politiki mu kwitabira ibikorwa bya politiki mu Rwanda, no kujya mu myanya ifatirwamo ibyemezo. Ibi biganiro byabereye ku cyicaro cy'Ihuriro, ku Kacyiru.



Tariki ya 11 Nyakanga 2024, Itsinda ry'Indorerezi zo mu Muryango w'Afurika Yunze Ubumwe (AU) ryagiranye ibiganiro n'Ubuyobozi bw'Ihuriro. Izi ndorerezi zari zigamije kumenya uruhare rw'Ihuriro mu bikorwa by'amatora ya Perezida wa Repubulika n'ay'Abadepite yo muri Nyakanga 2024. Ibi biganiro byabereye muri Kigali Convention Center (KCC) iri ku

Kimihurura mu Mujyi wa Kigali.  
Tariki ya 12 Nyakanga 2024,



Itsinda ry'Indorerezi zo mu Muryango uhuzaga Ibihugu byo mu karere ko mu biyaga bigari (International Conference on the Great Lakes Region, ICGLR), zituruka mu bihugu 12 bigize uyu Muryango zasuye Ihuriro. Izi ndorerezi zari zikeneye kumenya uko Ihuriro n'Imitwe ya Politiki irigize biteguye kugira uruhare mu matora ya Perezida wa Repubulika n'ay'Abadepite yo muri Nyakanga 2024. Ibiganiro byabereye ku cyicaro cy'Ihuriro kiri ku Kacyiru, mu Mujyi wa Kigali.

## IHURIRO RY'IGIHUGU NYUN- GURANABITEKEREZO RY'IMITWE YA POLITIKI RYA- KURIKIRANYE AMATORA YA PEREZIDA WA REPUBULIKA N'AY'ABADEPITE YO MURI NYAKANGA 2024



Ihuriro ry'Igihugu Nyunguranabitekerezo ry'Imitwe ya Politiki ryohereje mu turere 30 tw'igihugu indorerezi 99 zituruka mu Mitwe ya Politiki

cumi n'umwe irigize, zikurikirana ibikorwa by'imyiteguro n'imigendekere y'amatora ya Perezida wa Repubulika, n'ay'Abadepite yo muri Nyakanga 2024.



Tariki 12 Nyakanga 2024, indorerenzi zose zahuriye ku cyicaro cy'Ihuriro zihabwa amabwiriza atandukanye y'uko igikorwa cyo gukurikirana amatora kizagenda zinahabwa ibikoresho zizifashisha. Muri ayo mabwiriza harimo: kureba niba site z'Itora ziteguye neza; kureba ko ibikoresho by'amatora biri kuri site itorerwaho; kureba uko amatora yitabirwa; kureba ko uburenganzira bw'abaje gutora bwubahirizwa; kureba ibarura ry'amajwi n'ibindi.

Ubutumwa bw'indorerenzi z'Ihuriro bwakozwe mu matsinda aho buri tsinda ryari rigizwe n'abantu 3 baturuka mu Mitwe ya Politiki itandukanye. Nibura buri mutwe wa Politiki wagize ahanu habiri uyobora itsinda. Ayo matsinda niyo yoherejwe mu turere twose tw'Igihugu, akurikirana imyiteguro ku ma site y'Itora ku itariki ya 14 Nyakanga, naho tariki ya 15 Nyakanga akurikirana imigendekere y'amatora ya Perezida wa Repubulika n'ay'Abadepite rusange 53 bo mu Mitwe ya Politiki n'abakandida bigenga. Tariki ya 16 Nyakanga 2024, indorerenzi z'Ihuriro zakurikiranye itora ry'Abadepite 24 b'abagore, iry'umudepite 1 uhagarariye abantu bafite ubumuga, n'itora ry'abadepite 2 bahagarariye uruburiko. Indorerenzi z'Ihuriro zashimye uburyo amatora yateguwe,

agakorwa mu mucyo no mu ituze. Mu byo indorerenzi z'Ihuriro zashimye harimo ibi bikurikirara:

- Uburyo Komisiyo y' Igihugu y Amatora yakoresheje mu kumenyesha Abanyarwanda ibirebana n'amatora burimo gukoresha ibiganiro no kunyuzza amatangazo mu bitangazamakuru binyuranye birimo Radio na Televiziyo, imbuga nkoranyambaga n'ubundi buryo bunyuranye;
- Ahabereye amatora hari ibirango bihagaragaza;
- Ibiro by'itora, ibyumba by'itora n'ubwihugiko byari biteguye, bitatse neza, kandi bifite isuku ku buryo bushimishije;
- Ibikoresho by'amatora byagereye ku gihe ahabereye amatora kandi abayayoboye bakiraga ababagana neza;
- Amatora yatangiye igihe kandi asozwa ku gihe;
- Amatora yakozwe mu mucyo, mu bwisanzure, mu ituze no mu mutekano usesuye;
- Amatora yakozwe hubahirizwa uburenganzira bw'abatora harimo no korohereza abafite intege nke;
- Amatora yitabirwe ku gipimo kiri hejuru;
- Ibarura ry'amajwi ryakozwe hakurikijwe amategeko n'amabwiriza bigenga amatora;

- Abaturage bitabiriye ibarura ry'amajwi kandi bishimiye ibyavuye mu matora.

Muri rusange, Ihuriro ry'Igihugu Nyunguranabitekerezo ry'Imitwe ya Politiki risanga amatora ya Perezida wa Repubulika n'ay' Abadepite yabaye tariki ya 15 n'ya 16 Nyakanga 2024 yaragenze neza kandi amategeko n'amabwiriza ayagenga yarubahirijwe. icyakora, Ihuriro risanga Komisiyo y'Igihugu y'Amatora ikwiye gukomeza gutunganya ilisiti y'Itora.

Uretse aya matora Ihuriro ryakurikiranye, rizohereza kandi indorerenzi zaryo gukurikirana imigendekere y'amatora y'Abasenateri ateganyijwe muri Nzeri 2024. Muri aya matora Ihuriro rikaba ritora abasenateri bane nk'uko biteganywa n'ingingo ya 80 y'Itegeko Nshingirya Repubulika y'u Rwanda. ■